

# EDITORIAL

VOL.62 ISSUE 113 RNI REGD. 8713/63 U NONGSAI HIMA Tarik 29.04.2019

## Lah ban kham shem jingeh ka BJP ban thaw Sorkar

**H**aba la pyrshang ban peit thuh bha ia ka ilekshon MP Lok Sabha (general election) kada dang ia id shakhmat, la ithuh shai ba ka BJP kaba dang don ha ka bor synshar ha India kan kham shem jingeh ban wan biang ha ka bor synshar da kaba suk. Wat la ka ilekshon ba la dep ka long dang tang lai bynta (phase-1, phase-2 bad phase-3) bad kaba dang sah ka long haduh sa saw bynta (phase-4, phase-5, phase-6 bad phase-7), hynrei la ithuh shai ba yn nym don kano kano ka seng sainpyrthei ka ban ioh lad ban thaw Sorkar tang marwei khlem ka jingiatreilang bad kiwei pat ki seng sainpyrthei. La ithuh shai ba kan wan ka Sorkar synrop hadien ka jingniew vote ka ban long ha ka 23 tarik Jymmang 2019.

Kum ban shu pynkymaw, ha ka ilekshon MP kaba la lah (2014), ka BJP ka la jop haduh 282 seat bad ka lah ban thaw Sorkar khlem da iatreilang bad kiwei pat ki seng sainpyrthei (absolute majority). Hynrei kumba ka dep don lypa ka jingiateh naduh kaba sdang bad kiwei pat ki seng sainpyrthei hapoh ka kynhun synrop ba la tip kum ka National Democratic Alliance (NDA), ka BJP kan banse ban iatreilang bad la ki jong ki paralok wat da donkam ban iatreilang bad ki. Ka jingjop kput ka BJP ha ka ilekshon MP sha Lok Sabha kaba la long san snem mynshuwa, ka long na kiba bun ki daw bad ngim da donkam ban batai bniah hangne naba baroh ki tip bha shaphang kane.

Hynrei lada la phai pat sha ka ilekshon MP kaba long mynta u snem, la ithuh shai ba ka BJP ka don hapdeng ka jingeh kaba khraw. Wat la ki don katto katne ngut ki nongialam ka BJP kiba la pyrshang ban kob sarong da kaba ong ba ka seng kan kham leh bha ha kane ka ilekshon kaba long mynta u snem ban ia kaba ka long ha u 2014, hynrei la ithuh shai ba kane ka seng ka don hapdeng ka jingeh kaba khraw. Haba la pyrshang ban sngapthuh bha ia ki jingkynthoh jong kiba bun ki nongialam ka BJP ha India, la sngewthuh shai ba wat na ka liang jong ki ruh ki la artatien ba ka seng kan dang lah ban leh bha ban ia ka ilekshon kaba la lah.

Kumba ka long mynta, la ithuh shai ba ka BJP kan hiar ha kiba bun ki jylla. Wat lada ka BJP ka dang lah ban wan kum seng sainpyrthei kaba bun paid tam (single largest party), hynrei kan don ka jingialeh kaba jur na ka bynta ka jingthaw Sorkar. La sngewthuh shai ruh ba ka Congress bad kiwei pat ki seng sainpyrthei kiba don ha ka liang pyrshah kin pyrshang bun ki lad ki lynti ban nym ailad ia ka BJP ban wan biang ha ka bor synshar. Ia mynta ka kynti, ka long kaba eh ban batai ka NDA ba la lamkhmat da ka BJP kan dang wan biang ha ka bor synshar ne ka ri India kan ioh ia kawei pat ka sorkar synrop kaba thymmai.

### Ka Jylli Ki Khraw Pyrkhat U nongialam u pyndonkam ia ka dohnud bad kumjuh ruh ia ka khlieh jong u.

Printed, Published and Owned by Mrs. AR Lyngdoh Mawphlang and printed at U Nongsain Hima Offset Printing Press, Industrial Estate, Shillong and Published at Khasi National Durbar Hall (Ground Floor) Mavis Dunn Road, Mawkhair, Shillong - 793001. Editor: Bah L. Thabab .. Ph: 0364-2544773; 9863060455, 9863197788, 8794187135, 9862831987 Advertisement: Ph: 0364-2544773, 9862506932, 9863136797, Email: nongsain@yahoo.co.in

# Ka Hok Long Trai ia la u Symbai

Ha ka jingiakren bad ka kot khubor, Ka Hindu (Iaiong 6, 2012), u Dr. Debal Deb, u riew shemphang uba trei ban pynneh ia u kba, u la pynpaw ba ka India ka la ju don palat 100,000 ki jait kba kat haduh ka snem1970. Hynrei, namar ka Sorkar India ka la pynshlur ban thung da kita ki jait kba ba heh kloie bad pynmih kba shibun (HYV symbai) lyngba ka green revolution, ki jait kba ba ju don bad ki nongrep, kita ki symbai kba tynrai ki la nang duh namar ki brieve kim da thung shuh ia ki. Mynta, ki don tang kumno kumno 6000 jait ki kba kiba dang long dang man ha ka ri India. Kane ka long kaei kaei kaba sngewsih ban tip namar ba naduh 14,000 snem mynshwa la lap ba ka tynrai jong u kba ka dei ka Ri India. Ha kaba sdang, la don tang shijait arjait bad ki nongrep ki pyrshang ban pynkha sha kiwei pat ki jait symbai bad katba nang ia id ka por, kiwei ki jait kba ki nang mih. Ka don ka jingsheptieng ba lada ngim sumar ia ki symbai kba tynrai ba dang don, ki jait kba tynrai na ki shnong jong ngi ki lah ban duh noh syndon.

**Gratia E. Dkhar, Naphishisha Nongsiej and Bhogtoram Mawroh**

nongialam balang bad nongialam shnong ki la iaroh ia ka jingmad

U Dr Deb u pyrshang ban iada ia kane da kaba buh ia ka jaka buh symbai kaba kynthup palat 700 jait ki kba na kane ka thain. Kaba pynneh ia kine ki jait kba, ym tang ba ka wanrah ia ka jingsngewtynnat, hynrei kine ki kba tynrai na ka thain ki don ruh ia ka bor ban ialeh pyrshah ia ki khniang bad ka jingkylla ka suinbneng. Ha ka Biodiversity Festival ba dang shen ba ka pynlong da ka North East Network ha Chizami, Nagaland, ha ka 7 bad 8 tarik u Lber 2019, u Dr Deb u la kren shaphang ka bor tei met kaba don ha kine ki jait kba tynrai kaba kham bun ban ia kito kiwei pat ki jait symbai ba shu thied na iew.

Ha kajuha ka por, ka rukom ban wanrah ia ki jait kba bathymmai ka dang ia id-shaphrang bad la nang iai wanrah ia ki jait symbai bathymmai nalor kiba la don lypa da ki kompeni shna symbai bad ia kane ka kam, ki pynlut shibun ka pisa. Ka jingleh don bor kine ki kompeni kiba trei ia kane ka kam, ka la pynudua ia ka jingbun ki jait kba ba lah ban ioh hi na ka thain. Ka jingioh nong jong ki ka la nang bun namarba ka dor jong ki symbai ka la nang kiew ha kaba ki nongrep ki hap ban leit beit sha ki ban ioh iaki symbai bathymmai. Ki nongrep kim lah ban buh symbai haba thung ia kine ki jait kba ba shna ki kompeni. Kaba mih nangne ka long baka buh ha ka jingma ba lah ban duh jait noh ki symbai tynrai ba ju ioh na ka thain bad ka jingshong syber ki nongrep namar ki hap ban thied symbai ha man ka kynti ba ki thmu ban rep kba. Hynrei, ka don sa kawei pat ka khana ba donkam ban iathuh; ka jingtrei shitom ki nongrep ym tang ban rep hynrei ban pynneh ia ki symbai ba la ju don naduh hyn-dai ha ka thain bad ban pynmih ruh ki jait symbai ba thymmai bad ban kyntiew bad pynpaw nam ia kiba thymmai. Kine ki nongrep ka thain, khlem da don ia kano kano ka jingiaidei bad ki kompeni ne ki seng ne khlem da don jingmut bad iohngon na ki jingshem jong ki, ki pynmih ia ki symbai bathymmai bad ki ia sam iaki paralok parajor ha ka imlang sahang. U Bah Kolishon Barimma ka shnong Liarsluidu dei uwei na kine ki nongrep. Ka kynhun na NESFAS ka la ioh jingtip shaphang kane ha ka por ba long ka Indigenous Rice Festival ba la pynlong da ka NESFAS ha ka 13tarik u Lber 2019 ha Liarsluid ha kaba u Bah Kolishonu dei uwei na ki nongkren.

U Bah Kolishon Barimu dei u nongrep ba la 57 snem ka rta na Liarsluid, ka shnong kaba don jingiaidei bad kiba bun ki khatanang. Kane ka shnong ka hap ha ka Bhoiryumbong Community and Rural Development Block jong ka Ri Bhoi District bad ka hap ruh hapoh ka Raid Iapngar jong ka Hima Khyrim. Hapoh ka Raid, ia u Bah Kolishonla ithuh kum u nongrep uba la lap ia u jait kba ba la tip kum u "Khawjwain".

Ha ka snem 2008, katba u Bah Kolishon u dang lum ia ki jingot, u la iohi ia artyli ki jyntang kba kiba kham pher na u Kba Lakang ba la rep hangta. Une u jaitbathymmai u don ia ki jyntang ba kham jrong, ki sla ba kham iar, u sop-kba ba kham-phyrnai bad u khaw ba kham heh. Da ka jingsngewphylla eh halor kane ka jingshem, u la pyniia la ka jong ka kurim, ka Kong Houstina Jalong, bad u la rai ban lum ia ki symbai na u bad ban buh bha ha ka ryansan hajan ka dpei. Ynda la poi ka aiom bet, u la bet ia une u symbai bathymmai ha i jaka iba rit. Na ki artylli ki jyntang kba ba u la buh bha, u la ioh ban ot shi kilo u kba. Haba u la iohi ia ki jinglah une u symbai bathymmai ban roi, u la rai ban nang pynroi shuh shuh ia u.

Ha ka snem ba bud, kata 2010, u Bah Kolishon u lah ban ot sa shi byrni shiteng (kumba 80 kilo) u kba. U la tyngkai ia saw song u kba ban bet ha ka aiom ba dei, katba ia uba tam pat la shet bad bam lang bad ka doh bad kiwei kiwei ki jingtah ha ka "bam ja thymmai" (kaba dei ka jingleh kmen ba shisien shi snem na ka jingot ba nongkong). Bun kiba la wan sha kane ka jingia bam sngewbha kiba kynthup ia ki

bad jingiwbih jong une u khaw. Nalor kaba long u jingbam ba kongsan, ia kiwei pat ki jait jingbam ruh, lah ban shna na une u khaw.

Ka jingbna shaphang une u jait khaw bathymmai ka la pur ha kylleng ka Raid, bad la ai kyrteng ia u "Kba u kpa u heh" (u Heh u dei u khun ba nyngkong jong u Bah Kolishon). Ki brieve ki sdang ban wan jngoh ia ka iing jong u ban pan ia une u symbai. Ha ka snem 2011, u la ioh ot 50 byrni u kba, kane ka kham bun ban ia kaba ioh ot na kiwei kiwei pat ki jait kba ba u ju ioh kumba 42 byrni. La kumba shiteng na ka jingot jong u, la ai sha ka trai jaka kum ka bai wai namarba u Bah Kolishon u la shim wai ia ka jaka rep. Kane ka trai jaka ka dei na ka shnong Mawlang ha East Jaientia Hills. Ka trai jaka ruh ka la bang bha ia ka jingmad, ka dur bad ka jingiwbih une u khaw bad ka la kyrpad ia u Bah Kolishon ban iai rep ia une u khaw. U la buh saw byrni ialade bad u la ai katto katne ia u kynum jong u uba sah ha ka shnong ba marjan, ka Thadnongjau (kaba jngai kumba 20 minit na Liarsluid), khnang ba ma u ruh un lah ban pynroi ia une u jait kba. Ha ka snem 2012, na ki 30 byrni, palat shiteng la sam sha kiwei ki nongrep na Liarsluid, Khweng, Pynthor bad ki jaka ba jngai kum ka Nongstoibad Marmai. Ha ka snem 2013, u Bah Kolishon u la ai kyrteng "Kba Jwaiin" ia u namarba u long uba pher.

Lyngba ki jingshem jong u, u Bah Kolishon u la lap ba ia une u jait symbai dei ban bet ha ka taiew ba ar jong u bnai Jymmang bad rah ia ki sara ban thung shawei pat ha u bnai Jylliew bad ka jingot ka dei ban sdang ha u Naiwieng. Une u jait u lah ban shan haba wan ka lyer bajur, u lah ban ialeh pyrshah iaki jingpang kba bad u lah ban san ha ka jaka ba duna ka um. Kiwei ki jait kba ki donkam ban pynkylla ia ka jaka thung hapoh ka 3-4 snem, hynrei u Kba Jwaiin donkam ban bujli jaka haduh hynniew snem. Ia kane ka jingbuji jaka, la batai ba u kba u thait ban shong ha kajuha ka jaka. Lada pynpher ia ka jaka thung, u kham seisoh. Ban thung ia u kba Jwaiin, ym donkam ban ai dawai eiei. Kaba sngewtynnat ka long ba shiphew snem hadien ba u la lap ia u Kba Jwaiin, u Bah Kolishon u la lap sa ia uwei pat u jyntang kba uba pher-na u Kba Lakang, uba dei da uwei pat uba thymmai. Mynta u la tyngkai bha ia une ban ioh pynroi na ka bynta ka aiom bet ban wan.

Ka Article ba khyndai jong ka "Farmers Rights in the International Treaty on Plant Genetic Resources for Food and Agriculture"ka ong ba dei ban don ka jing ithuh ia ka jingnoh synniang ka imlang sahang bad ki nongrep ha baroh ki bynta jong ka pyrthei, khamtam kito kiba don ka ki jaka ba dang bun ki jait jingthung. Kine ki nongrep ki iai noh synniang kin iai bteng ban pynneh bad pynroi iaki jingthung-tynrai kaba long ka nongrim jong ka jingshnong shngaiin ka jingdon ka bam la jong bad ka kam rep tynrai ba long trai hi". Hynrei ym dei tang ka jingnoh synniang sha ka jingpynmih ia ka bam kaba dei ban ioh jingithuh hynrei ia kiei kiei kiba don ha lyndet ka rukom rep ba la ju leh naduh hyn-dai, dei ban kyntiew.

Ka pyrkhat pyrdaiin ha ka rukom treikam jong ki nongrep jong ngi kum i Bah Kolishon, ki long mar ia pyrshah bad ka rukom pyrkhat bad treikam ki kompeni shna symbai. Kine ki kompeni ha kine ki por mynta ki la pynshong nongrim ia ka rep ka riang tang ha ka jingiohnong bad shibun ki nongrep ki kit ram namarba la shaniah eh tang ha kiei kiei kiba nabar kum ki symbai, ka sboh, bad ki dawai khniang). Kane ka rukom treikam ka ktah jur halor ka jinglong hok jinglong trai ia kano kano ka jingshem). Ka jingdon kine ki kompeni ki la nang wanrah ki jingeh iaki nongrep bad ka la nangpynhiar dor ia ka kam rep kam riang.

Hynrei ka jinglong ki nongrep jong ngi pat kum i Bah Kolishon, ki pyn-don kam ym tang ia ka jingnang na ka jingshem jong ki, hynrei ki ia sam ruh ia ka jingnang jingtip sha kiwei ruh khnang ban ioh jingmyntoi lang ki para shnong para thaw. Ka thong ba ki nongrep kum u Bah Kolishon ki angnud ka long ym tang na ka bynta ka imlang sahang jong ki hi hynrei na ka bynta ka pyrthei baroh kawei ba ki nongrep kin don la ka hok halor ka jingtreikam jong ki. Kaba kham kongsan na kine ka long ban long trai ia la u symbai uba long u tynrai ne ka nongrim jong ka rep ka riang. Haba don la u symbai bad haba ym donkam ban thied ia u ne shaniah ha ki kompeni, ka wan ka jingshngong shngaiin bad jingsngewskhem ba ka ngi don ka hok long trai ia la ka jong ka bam ka dih bad ngi lah ruh ban pynmih ia la ka jong ka bam ka dih.

"Ka jinglong trai ia la u symbai ka wanrah ia ka Mei-ramew ba riewspah kaba lah ban ai ha ngi ia ka bam ba dap biang."

## IAKNIEH KI MDC IA KA SONG JINGIARAP KA SORKAR INDIA (SPA)

### Philip Marwein

Ka sorkar India, na ka por sha ka por, ka ju bei peisa kyrpang kum ka jingiarap sbun ia ki District Council jong ka jylla Meghalaya bad jong kiwei ki jylla jong kane ka thain shatei lam mihngi kiba don District Council. Myn ha katai kawei ka snem 2017-18 ka Khasi Hills Autonomous Council ka la ioh jin haduh T.133 klur katba ka Garo Hills bad Jaintia Hills Council ruh ki la ioh lang ia kane ka jingiarap peisa kyrpang tangha ki kham ioh duna ban ia kaba ioh ka Khasi Hills. Kane ka jingiarap kyrpang (Special Plan Assistance) ka long shisha kyrpang na ka bynta ki kam pynroi pynsan bad ngi tharai ba kane ka jingbei tyngka ka la iarap shisha ia ki Council na ka bynta ki kam pynroi ia ki Constituency bapher bapher jong ki. Ngim tip satia kumno la pyn-treikam ia kine ki jingiarap hynrei ka jingshisha ka long ba ka T.133 klur tyngka ka la dep lut.

Niuma, lada ngi kynmaw bha, ka la mih shibun ka jingkhil phaloh haba la ia-bate ia kane ka song peisa hapdeng ki EM bad MDC ha ka por long CEM jong u Bah Pynshngain Syiem haduh ba ka shuki CEM jong u la shad doi doi bad ia la poi ruh shaduh ba ka sorkar jong u ka la khyllum bad ma u hi ruh u la duh ia ka shuki CEM. Ka daw bah tynrai balei ka la long kumne ka dei ka jingiaknieh ia kane ka song peisa ba la ai da ka sorkar India. Ka la don shisha ka jingbim ryntih ha ka rukom sam ia ka bhah, don kiba la ioh kham bun bad don kiba la ioh tang khyndiat, bad shisha ka la don ka jingkhia shiliang sha ki ba kham iadei jingmut. Kane ka jingjia ka la thaw histori hapoh ka District Council. Hooiid, ki la don ruh ki jingjia kiba mynshuwa kiba iasyriem kum kane hynrei, kim da paw pen ryngkew palat kum kane kaba la jia ia ka 133 klur tyngka. Kan jin da bha eh ban wad bniah mano ba la ioh bad katno, katno la iasam para MDC bad EM bad katno khlem da iasam, hynrei la shu pynlut phut ia kane ka peisa ka jong u paidbah. Hangne lada tih bniah khlem pep yn lap shibun ba synrum synrah bad ka jingleh kulmar.

Ha kane ka kynti kaba mynta ba synshar ka United Democratic Alliance (UDA) ruh ka la sdang mih ka huri hura halor ka jingsam ia ka song peisa kaba 52 klur

tyngka. Kane, lehse, ka lah ban wanrah ia ka jingkhil ka shuki u CEM. Ka huri hura ka mih halor balei ba la sam tang mar 50 lakh tyngka uwei u MDC? shano kaba tam ka leit? Kumba ka long mynta kiba thnum bad kiba kynroi ia kane ka bynta ki dei ki MDC na ka liang pyrshah (Congress) hynrei kumba lah ban sngewthuh wat kiba don ha ka liang ka UDA ruh ki don kiba thnum pyrshah napoh napoh. Namar lada sam mar 50 lakh tyngka na ka bynta 29 ngut ki MDC baroh ka peisa kan kot tang T.14.50 klur. Shano kaba sah kaba long T.35.50 klur kan leit? Hato ia kane ka peisa kaba sah yn iabate biang hapdeng ki MDC ne yn iabate tang hapdeng ki dkhot ka UDA ne tang para EM ne yn pynlut na ka bynta katto katne tylli ki project jong ka KHADC ne yn leh kumno? Ka long kaba dei eh ban iashai bha halor kane namarba ka dei ka peisa jong u paidbah, ym jong ka UDA lane jong ki MDC Congress lane ka peisa shimet jingnoh. Ka long ruh kaba dei eh ba kumno la shu pyn-leit lut ia ka T.35.50 klur tang ha kawei ar ki projek jong ka Council bad ki projek kiba kumno eh ne kiba da kongsan haduh katno. Nalorkata ruh haba shna ia kano kano ka project dei ban da iashai bad iamynjur lang hapoh ka Council bad wat hapoh ka iing dorbar thaw ain ruh. Ym lah ban shu thaw projek ne skhim marwei u CEM lane uwei ar ngut ki EM. Kumno yn shu pynngam ia kane ka peisa bah jong u paidbah tang ha ka projek Tourism ha Jingkieng Kalong ne ha kawei pat ka projek ba la mang da ka KHADC?

La katta ruh ka KHADC ka dei hi ban don la ki jong ki project kiba mih ki soh ym kum ka Khasi Heritage Village kaba ha Mawphlang kaba mynta ka la shu sah khongreng jot rathai kaba long ka jinglehraiin ia ka jaitbinyriew. Ka long kaba dei eh ba kham bun na kane ka tyngka ka dei ban leit sha ki kam pynroi jong ki Constituency da kaba sam lyngba ki skhim MDC. Hynrei la jar katta ruh ka don ka jingartatien kaba jur hangne. Kaba sngewsih ka long ba ki MDC ki slem bha

ban phah (submit) ki skhim bad bun na ki skhim ruh kim da long kiba myntoi eh na ka bynta ki paidbah. Ka jingwanrah skhim ruh ka long kaba thurmur bha. Ki long pynban tang ban shu pynsyrwa kai ia ka peisa khlem mih ki soh kiba neh bad kiba pynmyntoi ia ki paidbah babun balang. Ki la don bun bha kum kita bad wat ki skhim MLA ruh ki la mih bun bah kiba kum kine. Ka long kumba shu pynsyrwa kai lane bret kai ia ka peisa u paidbah tang ban myntoi mano re mno ne tang ban pynhun ia ki nongtrei party lane ki nongkyrshon jong ki MDC/MLA.

Kane ka long kaba shyrkhei shisha. Haba peit na baroh ki liang. Te hynrei, u lain tduh u long ba ia kane ka song peisa kaba kyrpang ba la ai na ka bynta ki kam pynroi hapoh u pud u sam jong ka District Council, ka dei ban leit kham bun eh hi na ka bynta ki kam pynroi jong ki Constituency bad kane ka mut ba hab ban iasam ia kane ka song lyngba ki MDC skhim. Une u CEM ba mynta, u Bah Teinwell Dkhar, kum u Rangbah nong-mihkhmat u ba la rim bha, u dei ban sngewthuh ia kane, ba ka jngai bhah skhim pynroi lem ia ki MDC ka kham kordor ban ia kaba shu bynshet sbuk ia ka song peisa ha ki project jong ka Council namar, da kaba leh kumta, ka wanrah shibun ba kynrum kynram bad ym lah lait na ka jingpynndonkam bakla ia ka peisa, namar ka peisa bha hi ka pynmatlah ia ka sang ka ma.

Ha kaba iadei bad kane ka bynta ngi iohi shai ba ka jingma ka ap hakmat eh ia ki Council khamtam, ynda la wan urlong bad la pyn-treikam ia ka jingpynbha ia ki District Council (Amendment to the Sixth Schedule). Ynda la pyn-treikam ia kane kan wan ka Direct Funding na ka Finance Commission bad ka jingwan ka song peisa kan long kaba jur kaba pynjawduw wat ia ki MLA ruh. Ha kata ka por ki MLA kin iaknieh ban ialeh MDC namar ki iohi ia ka peisa bah kaba wan ha ki Council. Mynta tang ia ka song peisa kaba 52 klur lane 133 klur ruh la ialong thma pynkhyllum shuki, ynda la wan da ki bun spah bad hajar klur lei lei, ym dei shuh tang ban pynkhyllum shuki hynrei lah ban ia-umsnam shisyndon ruh.